

18 Feb. 2025

समे .18:15 Hrs

<><><><><><>

Headlines

- केंद्री गृह मंत्री अमित शाह होरें जम्मू-कश्मीर च नमें आपराधिक कनूनें गी लागू करने दी स्थिति दी समीक्षा कीती।
- मुख्मन्त्री उमर अब्दुल्ला होरें आखेआ जे त्रौनें नमें आपराधिक कनूनें गी लागू करने च जम्मू-कश्मीर दा प्रदर्शन सकारात्मक रेआ ऐ।
- जल शक्ति मंत्री जावेद अहमद राणा होर उदयपुर च राज्यें दे मंत्रिएं दी कांफ्रेंस च जम्मू-कश्मीर दी पानी सरबन्धी नीति गी प्रस्तुत करडन।
- राष्ट्र व्यापी पहल नक्शा भूमि सर्वेक्षण जम्मू-कश्मीर दे 4 चुनी गेदी शैहरी मुकामी निकाएं च शुरू होआ
- ते जम्मू-कश्मीर प्रशासन नै शैहरी मुकामी निकाएं गी मजबूत करने लेई उच्च स्तरीय पैनल बनाया ऐ।

<><><><><><>

HM Criminal Laws

केंद्री गृह मंत्री अमित शाह होरें अज्ज मुख्मन्त्री उमर अब्दुल्ला ते उपराज्यपाल मनोज सिन्हा हुंदे कन्नै इक बैठक च जम्मू-कश्मीर च नमें आपराधिक कनूनें गी लागू करने दी स्थिति दी समीक्षा कीती। इस बैठक च त्रौनें नमें आपराधिक कनून भारतीय न्याय संहिता, भारतीय नागरिक सुरक्षा संहिता ते भारीय ासक्ष्य अधिनियम च दस्से गेदे पुलस, जेलें, अदालतें ते फोरेंसिक सरबन्धी बक्ख-बक्ख प्रावधानें दी मौजूदा स्थिति उप्पर ध्यान दित्ता गेआ। बैठक दे मगरा मीडिया आहलें कन्नै गल्लबात करदे होई मुख्मन्त्री उमर अब्दुल्ला होरें सांझा कीता जे त्रौनें नमें आपराधिक कनूनें गी लागू करने च जम्मू-कश्मीर दा प्रदर्शन मता सकारात्मक रेआ ऐ। उनें इनें नमें कनूनें बारै जागरूकता पैदा करने च खासतौरा पर शैक्षिक ते सार्वजनिक मंच उप्पर चुनी गेदी सरकार दी भूमिका उप्पर बी जोर दित्ता। मीडिया आहलें कन्नै गल्लबात करदे होई उनें आखेआ।

<><><><><><>

Rana-Water Conference

लगातार टिकाऊ जल प्रबंधन दी बक्खी इक महत्वपूर्ण गैंऽ दे चलदे जल शक्ति मंत्री जावेद अहमद राणा होर राजस्थान दे उदयपुर च जल सरबन्धी दुए अखिल भारतीय राज्य मंत्रिएं दे सम्मेलन च हिस्सा लै करदे ना। दो दिन चलने आहले इस सम्मेलन दा विषय ऐ “water vision@2047-the way forward”ते इस सम्मेलन दा आयोजन जल शक्ति मंत्रालय आसेआ कीता जा'रदा ऐ। इस सम्मेलन दौरान राणा होर जम्मू-कश्मीर दी जल नीति पेश करडन जेदे च पानी दी आपूर्ति ते सुरक्षित पीने आहले पानी उप्पर ध्यान दित्ता गेदा ऐ। मंत्री होर जम्मू-कश्मीर सरकार आसेआ भू जल स्तर च सुधार ते एकीकृत पानी प्रबंधन गी बढ़ावा देने लेई पुट्टी गेदी गैंऽ गी बी उजागर करडन।

<><><><><><>

Jal Jeevan Mission

ग्रामीण इलाकें दे घरें गी पीने आहला साफ पानी उपलब्ध करोआने आहली भेठा जम्मू-कश्मीर नै टकोहदी प्रगति हासल कीती ऐ। एह प्रगति जल जीवन मिशन तैहत हासिल कीती गेई ऐ। कुलगाम दे इक ग्रांऽ लंकेर पोम्बे च पैहली बारी नलके

राएं पीने आहला पानी उपलब्ध करोआया गेआ ऐ। पैहले लोकें गी इत्थे हैंड पंप ते पानी दे टैंकरें राएं पानी उपलब्ध हुंदा हा, हुन ग्रंs गी 187 करोड़ 68 लक्ख रपे दी पानी सप्लाई स्कीम राएं एह लाह हासिल होआ ऐ। एहदे कन्नै 80 घरें गी लाह हासल होआ'रदा ऐ। जम्मू-कश्मीर ग्रामीण इलाकें च रवा रदे लोकें गी पीने आहला साफ पानी उपलब्ध करोआने लेई बचनबद्ध ऐ। इस दौरान मुख् ध्यान पारदर्शिता, कारकरदगी ते सब्बनें दी शमूलियत पर दित्ता जा रदा ऐ।

<><><><><><>

IED

भारतीय सेना ते जम्मू-कश्मीर पुलस आसेआ इक टकोहदी सूह सांझे तौरा पर तपाशी अभियान शुरू कीता गेआ ऐ। सोशल मीडिया दी इक पोस्ट च चिनार कोर नै जानकारी दित्ती जे तपाशी दौरान सुरक्षाबलें आसेआ पुलवामा दे नागबरी च इक्क आई.ई.डी दा पता लाइयै उसी नकारा करी दित्ता गेआ। एहदे च आखेआ गेआ ऐ जे भारतीय सेना जम्मू-कश्मीर गी आतंकवाद मुक्त बनाने लेई बचनबद्ध ऐ।

<><><><><><>

Board-Restruction

यू.टी सरकार नै इक नमें सरकारी आर्डर दे राएं जम्मू-कश्मीर अनुसूचित जाति, अनुसूचित जनजाति ते पिछड़े वर्ग दे विकास निगम लेई निदेशकमंडल दा पुर्नठन कीता ऐ। पुनर्गठित वार्ड दी अध्यक्षता समाज कल्याण मंत्री करंगन ते इस च मैहकमे दे प्रशासनिक सचिवें दे कन्नै-कन्नै केंद्रीय मंत्रालयें ते राष्ट्रीय विकास निगमें दे नुमाइंदे बी शामिल होडन। निगम दे प्रबंध निदेशक, निदेशक ते सदस्य सचिव दे तौरा उप्पर कम्म करंगन। एहदा मकसद शासन गी सुचारू बनाना ते हाशिए उप्पर रौहने आहले समुदायें लेई विकास दे जत्तें गी बदाना ऐ।

<><><><><><>

NAKSHA

केंद्रीय मंत्री शिवराज सिंह चौहान होरें राष्ट्रीय भू स्थानिक ज्ञान आधारित शैहरी आवास भूमि सर्वेक्षण नक्शा कार्यकम दी मध्य प्रदेश च शुरूआत कीती। एह 26 राज्यें ते 3 केंद्र शासित प्रदेश दी 152 शैहरी मुकामी निकाएं च शुरू होआ ऐ। 194 करोड़ रपे दे फंड आहले केंद्र प्रायोजित प्रोग्राम दी शुरूआत जम्मू-कश्मीर दी 4 चुनी गेदी शैहरी मुकामी निकाएं च होई, इंदे च बिश्नाह, कटड़ा, अवंतीपोरा ते पट्टन शामिल न। इस जत्त दा मकसद शैहरी जमीन रिकार्ड गी ताजा तरीन करना, जमीन दे मालिकाना हक, पूरे ते सेई दस्तावेज, शैहरी योजना गी बदाना ते जमीन सरबन्धी विवादें गी हल करना ऐ। इस मौके पर बोलदे होई केंद्रीय मंत्री शिवराज सिंह चौहान होरें आखेआ।

<><><><><><>

JK High Level Committee

जम्मू-कश्मीर प्रशासन नै 74में संवैधानिक संशोधन कनून दे मताबक यू.टी च शैहरी मुकामी निकाएं गी functions/ functionaries ते फंड्स च चुनौतियें कन्नै निब्वड्यने लेई इक उच्च स्तरीय कमेटी दा गठन कीता ऐ। इस कमेटी दी अध्यक्षता मुख् सचिव होर करडन जिंदे च बक्ख-बक्ख मैहकमे दे मुख् प्रशासनिक सचिव ते श्रीनगर ते जम्मू नगर निगम दे आयुक्त बी शामिल होडन। एहदा मकसद शहरी मुकामी निकाय दे सशक्तिकरण च बादा आने आहले मुद्दें दी पंछान ते हल करना, विकेंद्रीकरण प्रक्रिया गी सुचारू बनाने लेई उपायें दी सिफारिश करना ते एहदे लेई माली मदाद गी उपलब्ध करोआना ऐ।

NDRF-Poonch

आपदा सरबंधी तयारिएं बारै राश्ट्रीय आपदा प्रतिक्रिया बल दी 13 बटालियन आसेआ पुंछ जिले च 15 रोजा स्कूल सुरक्षा कार्यक्रम दी शुरूआत कीती गई ऐ। आपदा प्रबंधन बारै विद्यार्थिएं गी जागरूक करने दे मकसद कन्नै इस जत्न दी शुरूआत पुंछ दे सरकारी डिग्री कॉलेज च होई। एहदे च कॉलेज दे प्रिंसीपल जसबीर सिंह होर बी शामिल होए। एन.डी.आर.एफ टीम आसेआ जानकारी आहले केई सारे सत्र लोआए गए ते आपदा दौरान अपनाई जाने आहली तरीकें ते ऐसे समें च कियां कम्म करना ऐ, उस बारै बी दस्सेआ दसाया गेआं ए.एस.आई विजय शर्मा होरें विद्यार्थिएं पर इस गल्ला लेई जोर पाया जे ओह आपदा दौरान कम्म करने आहले दूत बनन। आकाशवाणी समाचार कन्नै गल्ल करदे होई उनें आखेआ।

<><><><><><>

Run for Unity

भारतीय रिजर्व पुलिस दी इक बटालियन आसेआ रियासी जिले च शहीदें दे बलिदान गी चेत्ता करने ते उनेंगी सम्मानित करने दे मकसद कन्नै रन फॉर यूनिटी दा सरिस्ता कीता गेआ। कार्यक्रम दी अगुवाई कमांडिंग अफसर अनीता शर्मा होरें कीती। एहदे च अफसरें, कर्मिएं ते आम नागरिकें बदी-चढ़िए हिस्सा लैता। इस मौके 5 किलो मीटर द्रौड़ दा सरिस्ता कीता गेआ। इस मौके सब्बन शहीदें गी श्रद्धांजलि भेंट कीती ते राश्ट्रीय गौरव लेई मूल्लें कदरें गी बनाई रक्खने दा प्रण बी पाया। आकाशवाणी समाचार कन्नै गल्ल करदे होई आई.आर.पी दी कमांडिंग अफसर अनीता शर्मा होरें आखेआ।

<><><><><><>

Peerkho-Mela

औंदी महाशिवरात्रि मेले गी सुचारू ढंगै सिर करोआने लेई जम्मू पूर्व थवां विधायक युद्धवीर सेठी होरें पीरखो मंदर दा दौरा लाया। 25 थवां 28 फरवरी तगर चलने आहले मेले दी तैयारिएं दा उनें जायजा लैता। इस दौरान सांस्कृतिक कार्यक्रम ते दंगल बगैरा दा आयोजन बी कीता जाग। जम्मू दियां एडीसी अनसुइया जम्वाल होरें विधायक होरें गी कीते गेदे इंतजामें बारै जानकारी दिती। विधायक होरें इस दौरान साफ-सफाई, मुल्लें दी सजावट ते गल्लिएं च रौशनी दी बवस्था करने पर जोर पाया।

<><><><><><>